

ԱՐԵՎՄՏԱՀԱՅ ՄԱՄՈՒԼՆ ՈՒ ՀՐԱՊԱՐԱԿԱՆՈՍՈՒԹՅՈՒՆԸ
1880-ԱԿԱՆ ԹՎԱԿԱՆՆԵՐԻՆ

Գ.Ա.ՍՈՂՈՍՏՆՅԱՆ

1880-ական թթ. արևմտահայության ազգային և տնտեսական կացությունը, միջազգային իրավունքի առարկա դարձած Հայկական Հարցի հետ կապվող քաղաքական ու գաղափարական իրողությունները նոր ուղղություն և հուն տվեցին Կ.Պոլսում և Զմյուռնիայում հրատարակվող Հայ պարբերական մամուլին ու հրապարակախոսությանը: Այս տասնամյակից սկսած՝ լրագրությունը ձեռնամուխ է լինում ավելի լրջորեն և խորությամբ դիտարկելու ազգային իրականությունը, ազգի գոյատևելու, օսմանյան կառավարողների սաստկացրած բռնություններին դիմակայելու հնարավորությունները: Ժողովրդին մոտիկից առնչվելու, նրա հոգևոր, մտավոր ու տնտեսական դրությունը ճանաչելու, իրական պատկերացումների անհրաժեշտությունը ընդհանուր իսապատու դարձավ այդ տասնամյակի գաղութահայ մտավոր գործիչների, գրականության, ինչպես նաև լրագրության և մասնավորապես հրապարակախոսության առաջնային, թեկուզ և դեռևս ոչ միշտ լրջորեն ընկալվող խնդիրը: Եվ այս իմաստով 80-ական թվականները որոնումների, իրական կապերի ու հարաբերությունների մեջ խորանալու, Արևմտահայաստանի ճշմարտացի ճանաչողության ժամանակաշրջան էր, որ պահանջում էր նոր հայեցվածք, սթափ մտածողություն և փաստերի վրա հենվող լուսաբանումներ: Դրան նախորդող չրջանի ուժանտիկական, հաճախ՝ վերացական ու քմահաճ պատկերացումների հրապարակախոսությունը իր տեղն էր զիջելու նոր որակների: Կ.Պոլսուցյանի «Մասիսի» լրբերալ պատկերացումների, Օսմանյան Թուրքիայի բարեփոխման և դրանից ակնկալվող արևմտահայության կացության փոփոխությունների վերաբերյալ հույսերի կրախը հասցրեց այդ թերթի հասարակական ազդեցության անկմանը: Ինքը՝ «Մասիսը», որ դժվարությամբ էր ընկալում փոփոխված իրականության ընթացքն ու պահանջմունքները և մինչ այդ զերծ էր մնացել գրաքննական խստություններից, 1880թ. դարձավ Համիդյան գրաքննության առաջին զոհերից մեկը: Հարստահարությունների վերաբերյալ հոգված տպագրելու համար թերթը դադարեցվեց 1880թ. նոյեմբեր-դեկտեմբեր ամիսներին՝:

Հայ մշակույթի դեմ ուղղված բռնությունների նոր պայմաններում մամուլը ևս խստորեն պատժվում էր Հայկական Հարցին, գավառական Հարստահարություններին անդրադառնալու համար: Անհրաժեշտ էր ստեղծել այնպիսի պարբերական, որը դեպի իրեն ձգեր գրական և հրապարակախոսական կարող ուժերին, համախմբեր նրանց՝ լուսաբանելու Արևմտահայաստանի և գաղութահայ բնակչության կյանքի բոլոր ծալքերը, ընթերցողին ներկայացնելու իրականությունը առանց զարդարանքների կամ ենթադրությունների: Այս նպատակն էր ընկած, փաստորեն, 80-ական թթ. նոր գրական և լրագրական շարժման մեջ, որ արևմտահայ գրականության մեջ համարվում է ռեալիստական շարժման սկզբնավորում: Այս ընթացքը

գաղութաճայ Հասարակական մտքի և Հրապարակախոսության մեջ պայմանավորվում էր որոշակի շրջադարձով՝ դեպի գավառը, բուն ժողովրդական կյանքը: Մամուլը ևս Համընթաց էր գնում. գրական շարժմանը՝ իր առջև դրված խնդիրների մեջ առանձնացնելով ժողովրդի բոլոր խավերի կյանքի ուսումնասիրությունը, նրանց կենցաղի, բարոյականության ու հոգեբանության հետազոտությունը՝ իրենց բազմաշերտ դրսևորումների մեջ: Պետք էր պատրաստել կրթված և սթափ մտածող սերունդ՝ նոր կենսազգացողությանը, գաղափարներով և իրականության նկատմամբ ունեցած քննադատական լրջմիտ վերաբերմունքով: Այս նոր միտումները լրագրության մեջ ձևավորվեցին և իրենց զարգացումը ստացան «Արևելք» թերթի Հրատարակության (1884թ. Հունվար): Նորություն էր թերթի Հրատարակչական ու խմբագրական գործերի առանձնացումը: «Արևելքի» Հրատարակչական և ֆինանսական խնդիրներով զբաղվում էր նրա՝ ազդեցիկ դրամատուրգից կազմված վարչությունը: Ի պատիվ այս վերջինի, պետք է ասել, որ թերթի Հրատարակության սկզբնական շրջանում նրա անդամները կարողացան «Արևելքի» խմբագրական մարմնի մեջ ներգրավել Կ.Պոլսի երիտասարդ և տաղանդավոր ուժերին: Իրոք, թերթի խմբագրակազմի մեջ էին ընդգրկվել Ա.Արփիարյանը, Լ.Բաշալյանը, Տ.Կամսարականը, Բ.Քեչյանը, Մ.Կյուրճյանը և ուրիշներ: Գր.Զոհրապի աշխատակցությունը ևս «Արևելքին» տվեց Հրապարակախոսական փայլ և Հասարակական ազդեցություն: Իր՝ Գր.Զոհրապի կարծիքը «Արևելքի» գործունեության վերաբերյալ, ցույց է տալիս, որ թերթի գործիչները իրենց խնդիրն մոտեցել էին ամենայն լրջությամբ և լրագրական որոշակի սկզբունքներով: Ընդսմին, Զոհրապը ուշադրություն է դարձնում ոչ միայն «Արևելքի» թեմաներին, այլև գաղափարական ուղղությանը, լեզվին: Դիտելով, որ Կ.Պոլսի նոր լրագրությունը սկսվում է «Արևելքով», նա նկատում էր, որ նրա էջերում «Անհատական գծով խնդիրներն ու վեճերը տեղի տալով ընդհանուր տեսություններուն, Հայ լեզուն այս կամ այն խմբագրապետի գծած անձուկ սահմանները կոխոտելով՝ վերստացած էր ժողովրդյան բարբառի անկախությունը, դադրելով արհեստ մը լինելի՝ արվեստ դառնալու Համար... Հասարակական պետքերու ըմբռնումը: Ահավասիկ նոր լրագրությունը»:

Այս «նոր լրագրությունը» ամենից առաջ պետք է որոներ և կայացներ նոր ուղղություն՝ Հանրությանը ներկայանալով իբրև առաջադիմական և ժամանակակից պարբերական, որը մերժում է արմատականության և պաշտոնականության ծայրահեղությունները: Այլ կերպ ասած՝ «Արևելքը» նախընտրելի էր Համարում ծայրահեղությունները բացառող միջին գիծը, որ պետք է Հենվեր անցյալի ազգային արժեքների վրա և, մյուս կողմից, իրականացներ Հասարակության մտավոր ու հոգևոր բարեփոխումն ապահովող գաղափարների ու պատկերացումների քարոզչությունը: Հաշվի էր առնվում գրաքննական բռնությունների վտանգը, որ կախված էր Օսմանյան Թուրքիայում Հրատարակվող մամուլի գլխին և որը ստիպում էր գործածել չափավոր լեզու: Այս պատճառով, նշում էր թերթը, «Արևելքը» պիտի ջատագովե ազգային ներքին բարենորոգման դատն, ավելի ազատական, քան արմատական, և ավելի պահպանողական, քան Հետադիմական ոճով»: Կարծում ենք, որ դժվար է առավել բնութագրական գծերով ցույց

² Գր. Զոհրապ, Երկերի ժողովածու, Հ. 2, Ե., 1962, էջ 217:

³ Արևելք, 14. I. 1885:

տալ 80-ական թթ. արևմտահայ ժողովրդավարության նկարագիրը և գործելակերպը, որ ենթադրում էր մի Հայտնի չափավորություն, որ սակայն, այս ուղղության համար զգալի հնարավորություններ էր ստեղծելու լիբերալ և պահպանողական մտայնության առաջադեմ գործիչների հետ գաղափարական չփոխների համար:

Հրապարակյալ մատուցման տեսակետից ևս «Արևելքը» բերում էր իր նորությունները. նրա էջերում արևմտահայ լրագրության մեջ աննախընթաց զարգացում ստացան երեք ժանրեր՝ խմբագրականը (առաջնորդող), քրոնիկը, ինչպես և ակնարկի ժանրը: «Արևելքում» տպագրած իր խմբագրականներով Ա.Արփիարյանը հետևողականորեն և շարունակ ուշադրության կենտրոնում էր պահում հասարակականորեն կարևոր բազմաթիվ խնդիրներ (պատերազմը, սահմանադրական մարմիններ, գաղափարական կյանք, ազգային կրթական ու բարեգործական հաստատություններ և այլն): Քրոնիկի ժանրը հնարավորություն էր տալիս թուլացիկ, բայց և արագորեն անդրադառնալ օրվա կարևոր լուրերին՝ ինչպես Կ.Պոլսում, այնպես էլ գալաթում, Արևելյան Հայաստանում ու գաղթօջախներում: Իսկ քրոնիկներով «Արևելքը», առաջին անգամ արևմտահայ մամուլում, սկիզբ էր դնում եվրոպական լրագրական լրատվության ժանրին՝ այս հասկացության արդիական իմաստով: Ակնարկի ժանրը «Արևելքում» առավել քան ընդգծված ի Հայտ է գալիս դիմանկարային ակնարկի ձևով, որի երգիծական կատարման ամենափայլուն և նախորդող օրինակը տվել էր Հ.Պարոնյանը՝ դեռևս նույնորդ տասնամյակներին: Սակայն «Արևելքի» դիմանկարային ակնարկները հետապնդում են միանգամայն այլ նպատակ՝ հիմնականում վերհանել մոտիկ անցյալի, այլև ժամանակակից նշանավոր ազգային գործիչներին, որոնք նպաստել են ազգի հոգևոր ու մտավոր առաջընթացին: Անշուշտ, ժանրային այս հնարավորությունների օգտագործումը ևս «Արևելքը» դարձնում էր այնպիսի թերթ, որը ոչ թե սոսկ հետաքրքրություն էր հարուցում, այլ այդ հետաքրքրությունը դարձնում էր տպավորիչ միջոց՝ հանրային կարծիքի վրա ազդելու և հանրային հեղինակություն նվաճելու համար: Նշված ժանրերով «Արևելքում» հանդես էին գալիս Ա.Արփիարյանը, Գր.Ջոհրապուր, Լ.Բաշայանը և մյուսները: Ա.Արփիարյանի «Օրվան կյանքը» խորագրով քրոնիկներն ու առաջնորդողները, Գր.Ջոհրապուրի ակնարկները, ուղեգրական նոթերը և այլ գործերը, Մ.Կյուրճյանի, Տ.Կամսարականի և այլոց նյութերը փաստորեն ստեղծեցին լրագրական նոր ոճ, որը հույժ տարողունակ էր թերթի բովանդակությունն ու ուղղությունը արտահայտելու, առավել ևս՝ նրա հասարակական միտումները ավելի անկաշկանդ դրսևորելու համար:

«Արևելքի» հասարակական ազդեցության պատճառը մի Հայտնի չափով պետք է որոնել նրա գաղափարական թղթակցությունների ճշմարտացիության, շիտակության և շարունակականության մեջ: Թերթն անդրադարձել է Արևմտահայաստանի բազմաթիվ գաղառների Հայության տնտեսական ծանր իրավիճակին, օսմանյան իշխանությունների հարկային կեղեքող քաղաքականությանը, գաղառներում կատարվող մշտական հարստահալություններին և օտար ու ազգային գործողների կամայականություններին: Ի դեպ, գրաքննական նկատառումներով «Արևելքը» հարստահալությունները

⁶ Նույն տեղում, 4. VI, 15. VIII. 1884:

Հիշում է Հիմնականում դրանց դեմ բողոքների կապակցությամբ, մանավանդ այն դեպքերում, երբ բողոքողների մեջ կան նաև թուրք բնակիչներ: Արդարացիության, նաև Հասկանալի ինքնապաշտպանության այս մոտեցմամբ թերթն անդրադարձել է 1885թ. Հունվարին ինուսի ժողովրդի բողոքին, երբ ժողովրդի կողմից Կարին՝ պատգամավորություն էր գնացել (3 թուրք և 4 հայ)՝ բողոքելու հարկահավաքման ձևերի մեջ ապօրինություններ թույլ տալու գեմ:

Գավառի կացության բարեփոխման նպատակով «Արևելքը» առաջարկում է այն պահել Կ.Պոլսի Ազգային վարչության, պատրիարքի ու երեսփոխանների ուշադրության կենտրոնում, օգնել զավառացուն նյութապես՝ ստեղծելով փոխառություն Հիմնադրամներ, սատարել նրան՝ իր հայրենիքում մնալու և գավառի քայքայումը կանխելու նպատակով: Ելնելով գավառի, և առհասարակ, նաև քաղաքային Հայ բնակչության շահերից՝ «Արևելքը» առաջարկում էր բարելավել արևմտահայ սահմանադրական մարմինների գործունեությունը, դրան տալ, ըստ Հնարավորին, նպատակասլաց ընթացք: Այստեղից՝ «Արևելքի» առաջադեմ հրապարակախոսների քննադատական դիրքորոշումը Ազգային ժողովի պաշտոնատար անձանց դեմ: Ազգային ժողովի առաջատար գործիչներից Հ.Նուրյանը, էֆենդիական դասի այլ մարդիկ, որպես իրենց ժողովրդին խորթ, նրան օտարացած տարրեր, քանիցս քննադատության թիրախ են դարձել «Արևելքի» և Հետագայում «Մասիսի» էջերում:

Անդրադառնալով Հասարակական մտքի, գրականության և առհասարակ Հայ իրականության վերաբերյալ այս շրջանում կատարված բեկումնային փոփոխություններին, ակադ. Ս.Սարինյանը գրում է. «Հայ Հասարակական զարգացման այն շրջանը, որ ընդունված պարբերացմամբ կոչվում է 90-ական թվականներ, ըստ էության, սկիզբ է առնում 80-ականների կեսերից: Բեկման Հոգեբանական ձևահայտը Հայկական ռոմանտիզմի անկումն էր, ռոմանտիզմի թե տնտեսական, թե քաղաքական, թե ազգային և թե դրական առումներով: Հայ աշխարհայացքը անցում է կատարում իրապաշտության»:

Այսպիսի անցումը կատարվում էր Համազգային ընդգրկումներով, իբրև ամբողջություն կազմող գործընթաց, որ պայմանավորված էր Հայ զույգ Հատվածների Հոգևոր ու մտավոր շփումների և մերձեցման աննախընթաց չափերով: Այդ չափերը երկուստեք, և ըստ ամենայնի, ներկայացնում էր մամուլը, որի առավել լայնախոհ ու լիարժեք իրականացնողներից էր «Արևելքը»: Իրոք, «Արևելքի» ուղղության մասին խոսելիս լուրջ ուշադրություն պետք է դարձնել Գր.Արծրունու Հետ Ա.Արփիարյանի և նրա մերձավոր հրապարակախոսների փոխադարձ գաղափարագործնական կապերին: «Միացյալ ընկերությանց» գործունեությունը ֆինանսավորելու, ինչպես և կազմակերպչական հիմքի վրա դնելու առնչությամբ «Արևելքի» գործիչների ու Գր.Արծրունու շփումները նշանակալիորեն նպաստեցին ոչ միայն այդ ընկերության արդյունավետությանը, այլև Ա.Արփիարյանի ազատամտական Հայացքների զարգացմանը, անշուշտ, Գր.Արծրունուն և, մի Հայտնի չափով, Բաֆֆու ազդեցության ներքո: Ի դեպ, «Արևելքի» շուրջ խմբված վերոհիշյալ գրողներն ու հրապարակախոսները ամենևին էլ սեպ

⁵ Նույն տեղում, 30. I. 1885:

⁶ Ս.Սարինյան, Հայ գաղափարաբանություն, Ե., 1998, էջ 55:

չէին խրում Բաֆֆու և Դր.Արծրունու հայացքների միջև և կամ էլ հակադրում նրանց, որ շատ ավելի ուշ ժամանակների արդյունք պետք է լինեն, և որին այստեղ հարկ չկա անդրադառնալու: «Մշակի» այս անհատականությունները խորապես հարդելի և ընդունելի էին «Արևելքի» երիտասարդ գործիչների համար: Դրա վկայությունն են Ա.Արփիարյանի տեական աշխատակցությունը «Մշակին», արևելահայ նշանավոր խմբագրի գործունեությունը բարձր գնահատականը «Արևելքում»⁷, ինչպես և Բաֆֆու «Խամսայի մեկնությունների» տպագրությունը այդ թերթում:

1885թ. «Արևելքում» հայտնված «Ռուսական սուրհանդակ» խորագիրը, որ հետամտում էր արևմտահայ ընթերցողին ծանոթացնել Ռուսաստանի, Անդրկովկասի կյանքին և իրականությանը, դարձյալ վկայում է Ա.Արփիարյանի՝ «Մշակի» հետ ունեցած գաղափարական ընդհանրությունների և «Արևելքի» հրապարակախոսների՝ Ռուսաստանի նկատմամբ համակրանքների մասին:

Իժպար է գերազանհատել «Արևելքի» դերը արևմտահայ գրականության մեջ ռեալիզմի զարգացման և դրա տեսական հիմնավորման գործում: Ռեալիստական գրականության և գեղագիտության զարգացումը արևմտահայ կյանքում պայմանավորված էր, ինչպես տեսանք, հենց 80-ական թթ. իրականության պահանջմունքներով: Գավառի և քաղաքի հայ բնակչության կյանքի արտացոլումը այդ գրականությունը դարձնում էր ազդի ինքնաճանաչողության, սեփական գնահատական կայացնելու իրատեսական միջոց, անհատի և հանրության համար: Թեմաների, կերպավորման, վերլուծությունների մեծ հնարավորությունը այս ուղղությանը ընձեռում էր ընթերցողին հասցնելու խոր և կենսական ճշարտություններ: «Արևելքի» հեղինակների նորավեպերը, վիպակներն ու գեղարվեստական այլ գործերը հեղաշրջում առաջ բերեցին գրականության մեջ և տասնամյակների համար լայն հուն բաց արեցին՝ ապահովելով նրա ընթացքը: Այս իմաստով «Արևելքը» հայ իրականության մեջ այն եզակի պարբերականներից է, որը ոչ միայն սկզբնավորեց նոր լրագրություն, այլև նոր ուղղություն գրականության մեջ, որի աշխատակիցները հանդես եկան իրրև և մեկի, և մյուսի տաղանդավոր մշակողներն ու զարգացնողները: Սրանով հանդերձ, 1880-ական թթ. ռեալիստական գրականության գեղագիտական մեկնաբանության ու հիմնավորման գործում չպետք է անգիտանալ Ջոյունիայում Գր.Մսերյանի խմբագրությամբ հրատարակված «Մետեորա» տարեգիրքը (1880 - 1881): Այս տարեգիրքը, ինչպես հայտնի է, իր լուրջ տեղն ունի XIXդ. 2-րդ կեսի ազգային-ազատագրական պայքարի գաղափարաստության, ինչպես և ռեալիստական գեղագիտության սկզբունքների տարածման ասպարեզում⁸: Տարեգրքի «Գիտական» բաժնում տպագրվել է Պ.Փիլարի «Վարդապետություն իրականին» գործը՝ Գր.Մսերյանի որոշակի

⁷ Լ.Մուրադյան, Արփիար Արփիարյան, Կյանքը և ստեղծագործությունը, Ե., 1991, էջ 26 - 27:

⁸ Ա.Խառատյան, Արևմտահայ մամուլը և գրաքննությունը Օսմանյան Թուրքիայում, Ե., 1989, էջ 251:

⁹ Տարեգրքի մասին հանգամանորեն տե՛ս Մ.Հակոբյան, «Մետեորա» հանդեսը արևմտահայ լուսավորական-գեմոկրատական շարժման մեջ Ե., 1977: Վ.Զարդարյանը նշում է, որ գրաքննության խստությունը պայմաններում «Մսերյան ստիպվեցավ փակել տպարանը և քաշվիլ հանրային գործունեություն և սակայն, մասնավորելով իր եռանդուն փափաքը Հայկական դատի մասին» (Վ.Զարդարյան, Հիշատակարան, Կահիրե, 1940, էջ 41):

մտահղացման համաձայն: Այն պետք է ժողովրդականացնեն պոզիտիվիզմի իմաստասիրական սկզբունքները: Ռեալիստական գեղագիտությունը աղերսվում էր պոզիտիվիզմին, ինչպես ցույց է տալիս ֆրանսիական ռեալիզմի պատմությունը¹⁰, մասնավորապես, կենսական իրողությունների սթափ դիտարկման և փորձն այդ իրողություններից բխեցնելու սկզբունքի տեսանկյունից: Փորձից բխող վերաբերմունքը, ի վերջո, հոգեբանության որոշակի հիմքերը և վերջինի թելադրանքով՝ մարդու վարքագծի դրսևորումները, դառնում էին գրականության այն կարևոր հատկանիշները, որով ռեալիզմի ուղղությունը արմատապես տարբերվում էր փորձից անկախ ենթադրությունների վկայակոչող ռոմանտիկական ուղղությունից: Եվ այս իմաստով պոզիտիվիզմի փիլիսոփայությունն ուղղվում էր ռոմանտիզմի գեղագիտության դեմ: Պատահական չէ, որ Գր.Մսերյանը տպագրեց «Վիկտոր Հյուգո և էմիլ Լիթերե» վերնագրով է. Զոլայի հոդվածը, որտեղ վերջինս կենսական իրողությունների ճշմարտացիությունը բարձր էր դասում ռոմանտիզմի վերացական պատկերացումներից: Հյուգոյի ռոմանտիզմի հանդեպ այս կեցվածքով Գր.Մսերյանը փաստորեն բանավեճ էր մղում ֆրանսիացի մեծ ռոմանտիկի հայ հետևորդների հետ, որոնց համար նա պաշտամունքի առարկա էր դարձել 1860 - 70-ական թթ. և որի երկեռի թարգմանություններով լեփ-լեցուն է նաև հետագա շրջանի հայ մամուլը¹¹: Ակներև է, որ Զոլայի գեղագիտական հայացքների և ֆրանսիական պոզիտիվիզմի գրույթների մատուցմամբ «Մետեորան» հարթում էր 1880-ական թթ. հայ ռեալիստական գրականության ուղիները¹²:

Նշված տասնամյակի արևմտահայ նոր լրագրությունն ու գրականությունը զարգացման կարևոր ազդակներ ստացան նաև Ա.Արփիարյանի խմբագրած «Մասիսում» (1887 - 1889): «Մասիսը» ոչ միայն խորացրեց «Արևելքի» սկզբնավորած հրապարակախոսական ուղղությունը (պարբերականին աշխատակցում էին «Արևելքի» գրագետները), այլև դրան տվեց որոշակիորեն կազմակերպված ու նպատակասլաց ընթացք: Ա.Արփիարյանը

¹⁰ М. К. Клеман, Проблемы реализма во французской литературе и история науки эпохи романа Эмиля Золя (Эмиль Золя. М., 1934, с. 5 - 68).

¹¹ Հայտնի են Գր.Զիլինկիյանի և Վ.Հյուգոյի փոխանակած նամակները՝ «Թշվառների» հայերեն թարգմանության առթիվ: Մեծ գրողի հետ նամակագրություն է ունեցել նաև արևմտահայ գրագետ Ա.Մոսիկյանը, որը նրան խնդրել էր կարծիք հայտնել իր մի ստեղծագործության մասին: Ստորև մեջբերում ենք Հյուգոյի պատասխանը նրա երկրորդ նամակին.

«Բարիդ, 17 փետրվար, 78

Պ.Արտակ Մոսիկյան

Ժամանակին կընդունիմ ձեր մի պերճախոս նամակ, որ ուղղված էր ձեր եղբայրներեն միին:

Հայ եք Դուք: Կսիրեմ այդ ազգ. կհարգեմ զայն՝ Դուք քաջ գիտեք զայս: Հայ ազգն պարտի երջանիկ լինել միանգամայն և պարծիլ՝ միայն և միայն, զի մարդ մ'ունի Զեզ նման, ի՞նչ այնքան ազնիվ գաղափարներով:

Իմ կարծիք կխնդրեք Զեր վսեմ էջերու համար: Կընդունիմ և կտամ Զեզ զայն: Մի մեծ միտ և գեղեցիկ հոգի ունեք Դուք: Կհիանամ Զեր հանճարի և տաղանդի վրա, որք շատ հույս կտան ապագային համար: Զեր հասակին մեջ ամեն բան արև և աստղ է Զեզ համար:

Շարունակեցեք և հուսացեք:

Հաճեցեք ընդունել, պարոն, շնորհակալություններու և հիացումիս հավաստին:

Վ.Հ., (Թերեմանը էֆքյար, Կ.Պոլիս, 1878, № 193):

¹² Է.Զոլայի վերոհիշյալ հոդվածը տե՛ս Մետեորան, հ. Դ, 1881, էջ 26 - 35:

Հետևում էր նոր «Մասիսի» ծրագրի իրականացմանը ուժեղացնելով դրա ազգային և գիտական մասը, սրելով հոգիվածների քննադատական ոգին, առավել ժողովրդական դարձնելով նրա լեզուն, լուսաբանելով ազգի տնտեսական դրությունը տպագրելով այս բնագավառին վերաբերող հոգիվածներ, թղթակցություններ և այլն¹³: «Մասիսը» հատուկ ուշադրություն էր դարձնում Կ.Պոլսի և գավառների ազգային մարմինների գործունեությանը, քննադատական բնութագրերով հանդես գալիս երեսփոխանական վերնախավի և երեւելիների դեմ: Նրա էջերում դատափետվում է Ազգային ժողովի ատենապետը, ցուցադրվում են երեսփոխանների կամայականությունը, անձնական նկատառումներին նախապատվություն տալը նրանց գործողություններում: Այսպես, պարբերականը համարձակորեն նկատում էր, որ Հ.Մերեմ-Գուլին (Ազգային ժողովի ատենաետ) և Սիմոն Մազսուտը իրենց բարձր դիրքին են հասել իրենց դասային (էֆենտիական) արտոնությունների շնորհիվ՝ չվայելելով երեսփոխանների համակրանքը և քվեների նվազագույն առավելությամբ: Ազգային ժողովի հասցեին Ա.Արփիարյանի քննադատական սուր ելույթները հասցրին նրան, որ խառն ժողովը 1887թ. մայիսի 7-ին հատուկ որոշմամբ դատապարտում էր «Մասիսի» «անպատշաճ խոսքերը» և պահանջում էր նրանից՝ «զգուշանալ ազգային գործոց և ժողովո մասին այսպիսի անհիմն և անպատշաճ հրատարակություններ ընել», հակառակ դեպքում, սպառնում էր գործի դնել «Հսրկ եղած օրինական միջոցներն»¹⁴: Իր խմբագրականում Ա.Արփիարյանը պատասխանեց, որ մազաչափ անգամ չի չեղվելու իր ընթացքից և քամահրում է Հ.Նուրյանի ու պատրիարք Հ.Վեհապետյանի սպառնալիքները: Հետագայում «Մասիսը» քննադատական նույն ուղեգծը որդեգրեց պատրիարք Հ.Ալըգյանի հանդեպ, որը և առիթ դարձավ վերջինիս համար՝ խափանելու «Մասիսը» (դադարել է 1889թ. հունվար-օգոստոս ամիսներին):

Իր իսկ աշխատակիցների նախասիրությունների բերումով («աշխատակցում էին Լ.Բաշայանը, Մ.Կյուրճյանը, Աղ. Փանոսյանը և ուրիշներ») «Մասիսն» ակտիվորեն անդրադառնում էր գրական ու հասարակական կյանքին: Ինչպես «Արևելքում», այստեղ ևս նոր դրական չարժման ներկայացուցիչները գրականությունը դիտում են կյանքի ճանաչողության, հասարակականորեն կարևոր խնդիրների, ազգին իրական ճշմարտություններ ներկայացնելու տեսակետից: Այստեղ գեղարվեստական մարմնավորում են ստանում չգունազարդված կապերն ու հարաբերությունները, Հայ մարդը՝ իր միջավայրից բխող և իրեն հատուկ մտածողությամբ ու հոգեբանությամբ: Նույն ուղիով ընթացող պարբերականի Հրապարակախոսության մեջ իրենց հասարակական ու մշակութային ընդհանրացնող գծերով ի հայտ են գալիս իրական մարդիկ՝ ազգային նշանավոր դեմքեր, մասնավորապես մտավորականներ՝ գրողներ, խմբագիրներ, ուսուցիչներ, որոնք ներկայացվում են իրենց գործունեությանն ու խառնվածքին բնորոշ գծերով: «Մասիսը» տպագրեց Գր.Զոհրապի «Ներսեն», «Այրին», «Փոթորիկը», «Պարահանդեսին

¹³ Մասիս, 1888, № 3912, էջ 2:

¹⁴ Նույն տեղում, էջ 2 - 3:

¹⁵ Նույն տեղում, 1887, № 3873, էջ 155:

¹⁶ Նույն տեղում, էջ 149:

¹⁷ Այս խափանումից առաջ «Մասիսը» շարաթերթ էր, իսկ վերահրատարակվելուց հետո՝ 1889թ. սեպտեմբերից՝ կիսամյա:

վաղորդայն» և այլ գործեր, Ա.Արփիարյանի «Դերասանուհին» նովելը, ազգային տեսությունները, քրոնիկները, Հ.Պարոնյանի ստեղծագործություններից, այդ թվում և «Պոուզը», Լ.Բաշայանի «Նալաթիո ռեսդը», «Սրբուհի մայրապետը», Տ.Կամսարականի, Աղ.Փանոսյանի, Ե.Ստյանի, Հր.Ասատուրի, Սիպիլի, Ե.Տեմիրճիպաչյանի և այլոց արձակ և չափածո երկերը: Հրապարակախոսական և գեղարվեստական ժանրերի միահյուսման օրինակ կարող են լինել Գր.Զոհրապի թղթակցությունները «Արշալույս Արարատյանի» վաղամեծիկ խմբագիր Հ.Սվաճյանի, Հակոբ Գուրգենի, Լ.Բաշայանի հոգիածները Պ.Աղամյանի և այլոց մասին: Ա.Արփիարյանը շարունակեց և խորացրեց արևելահայ գրականության և լրագրության հետ հաստատված կապերը, որոնք նոր որակ էին ստացել դեռևս «Արևելքի» էջերում: Իրոք, 80-ական թթ. «արևմտահայ գրական շարժման առանցքային հարցերից մեկը ազգի երկու հատվածների գրական-կուլտուրական միասնության ստեղծումն է, մերձեցում արևելահայ գրական-հասարակական կյանքին»: Դրա կոնկրետ դրսևորումներից են Ա.Արփիարյանի «Արարատ. կովկասյան գրականություն», «Արվեստահանդես գնացող կովկասցին», Լ.Բաշայանի «Հանդես գրականական և պատմական» և այլ նյութեր¹⁹: Արևելահայ գրականության բովանդակությունն ու միտումները «Մասիս» գործիչներին մղում էին ծանոթանալու նաև ռուս գրականությանը: Պարբերականը տպագրեց Մ.Լեւոնտովի «Դասալիքը» (թարգմ. Աղ.Փանոսյան), Ի.Տուրգենևի երկերը, հոգիածներ Ա.Պուշկինի, ռուսական վեպի վերաբերյալ և այլն²⁰: Իսֆֆու թարգմանած՝ Պ.Զուբովի «Հարաբաղի աստղագետը» «Մասիսը» արտատպեց «Մշակի» 1887թ. համարներից: Պարբերականն իր ընթերցողներին էր հրամցնում եվրոպական գրականության ընտիր էջերը (Համարտին, Վ.Հյուգո, Վ.Սարգոլ, Է.Մանվիլ, Մ.Բոլորինա, Ս.Պրյուդոմ, Ֆ.Գոթթե և ուրիշներ):

Ա.Արփիարյանը «Մասիսը» խմբագրել է 1887թ. հունվարից մինչև հունիս և, 1888թ. մայիսից «Մասիսի» տնօրինությունը դարձյալ ստանձնելով, խմբագրել է այն մինչև նույն թվականի դեկտեմբերի 14-ը, որից հետո «Մասիսը» կրկին դադարել է և վերահրատարակվել, ինչպես տեսանք, 1889թ. սեպտեմբերին՝ հետագա ամիսներին ևս ամբողջացնելով 1880-ական թթ. գրական հրապարակախոսական շարժման նկարագիրը արևմտահայ իրականության մեջ:

Այսպիսով, 1880-ական թթ. արևմտահայ լրագրության նոր որակները սկիզբ են առնում նախ «Արևելքի» ապա «Մասիսի» էջերում: Նոր լրագրության հատկությունները այս կամ այն չափով իրենց զգացնել են տալիս նաև Կ.Պոլսի և Զմյուռնիայի մի շարք այլ հրատարակություններում, բայց նպատակասլաց և ամբողջական տեսքով՝ միայն այս երկու պարբերականներում:

Արևմտահայ լրագրության նոր փուլը հատկանշվում է ամենից առաջ լրատվության իրատես և կոնկրետ բովանդակությամբ. լրատվության ցարուցրիվ, վերացական բնույթը, որ հիմնականում բնութագրական էր 1840 - 1870-ական թթ. մամուլին, փոխարինվում է հասարակությանը

¹⁸ Հայ նոր գրականության պատմություն, հ. 3, Ե., 1964, էջ 77:

¹⁹ Մասիս, 1889, № 3924, էջ 12 - 14, № 3925, էջ 23 - 29, № 3926, էջ 45 - 48, № 3936, էջ 215 - 216:

²⁰ Նույն տեղում 1887, № 3875, էջ 166 - 167, 1886, № 3803, էջ 533 - 540, 1887, № 3860, էջ 49 - 50:

հուզող կայուն տեղեկատվությամբ, իրական կապերի ու հարաբերությունների վերհանումով՝ սկսած հասարակական կարեւոր խնդիրներից և վերջացրած անհատների գործունեության լուսաբանումով, առօրեական իրողությունների անդրադարձով: Լրագրության զարգացումը իր հետ բերում է նաև լրագրական ժանրերի բազմազանություն և զարգացում: Այս տեսակետից պետք է առանձնացնել քրոնիկի՝ իբրև լրագրական լրատու ժանրի հաստատումը: Լրագրության վերաբերյալ այս նոր պատկերացումները մի հայտնի չափով համապատասխանում էին նոր գրական շարժման՝ ռեալիստական գրական շարժման ընթացքին ու բովանդակությանը:

Նոր լրագրության և նոր գրականության այս համատեղ հայտնությունն ու զարգացումը ընթանում էին գիրկընդհառն տեսքով, ուստի և բնավ պատահական չէ, որ այս երևույթը դիտելի է միևնույն հրատարակություններում և մեկի, և մյուսի բովանդակությունն ընդգրկող «Արևելք», իսկ այնուհետև՝ «Մասիս» պարբերականներում:

ЗАПАДНОАРМЯНСКАЯ ПЕЧАТЬ И ПУБЛИЦИСТИКА В 1880-ЫЕ ГГ.

Г. А. СОГОМОНЯН

Резюме

В 1880-е годы, в результате изменившихся национальных и экономических условий, начался новый этап развития западно-армянской журналистики. Издания этого периода способствовали формированию общественного мнения, выявлению реальных общественных связей и отношений. Этот процесс привнес в журналистику новые жанры. Новое представление о журналистике в известной мере соответствовало процессу становления нового литературного движения — реализма. Не случаен тот факт, что западноармянские писатели-реалисты 1880-х гг. А. Арпиарян, Г. Зограб, Т. Камсаракан, А. Башалян, М. Кючян (Граф), Е. Отян и другие на страницах газет «Аревелк» и «Масис» выступали как публицисты нового поколения и предвестники новой журналистики.